

# 易经

## 上 经

### 乾卦第一

乾：元，亨，利，贞。

初九 潜龙勿用。

九二 见龙在田，利见大人。

九三 君子终日乾乾，夕惕若，厉无咎。

九四 或跃在渊，无咎。

九五 飞龙在天，利见大人。

上九 亢龙，有悔。

用九 见群龙无首，吉。

### 坤卦第二

坤：元，亨，利牝马之贞。君子有攸往，先迷，后得主，利。西南得朋，东北丧朋。安贞吉。初六 履霜，坚冰至。

六二 直方大，不习，无不利。

六三 含章可贞。或从王事，无成有终。

六四 括囊，无咎无誉。

六五 黄裳，元吉。

上六 龙战于野，其血玄黄。

用六 利永贞。

### 屯卦第三

屯：元亨，利贞；勿用有攸往，利建侯。

初九 磐桓，利居贞，利建侯。

六二 屯如遭如，乘马班如，匪寇婚媾。女子贞不字，十年乃字。

六三 即鹿无虞，惟入于林中，君子几不如舍，往吝。

六四 乘马班如，求婚媾；往吉，无不利。

九五 屯其膏。小，贞吉；大，贞凶。

上六 乘马班如，泣血涟如。

### 蒙卦第四

蒙：亨。匪我求童蒙，童蒙求我；初筮告，再三渎，渎则不告。利贞。初六 发蒙，利用刑人，用说桎梏，以往吝。九二 包蒙，吉。纳妇，吉，子克家。

六三 勿用取女，见金夫，不有躬，无攸利。

六四 困蒙，吝。

六五 童蒙，吉。

上九 击蒙，不利为寇，利御寇。

## 需卦第五

需：有孚，光亨，贞吉，利涉大川。

初九 需于郊，利用恒，无咎。

九二 需于沙，小有言，终吉。

九三 需于泥，致寇至。

六四 需于血，出自穴。

九五 需于酒食，贞吉。

上六 入于穴，有不速之客三人来；敬之，终吉。

## 讼卦第六

讼：有孚，窒惕，中吉；终凶，利见大人。不利涉大川。

初六 不永所事；小有言，终吉。

九二 不克讼，归而逋，其邑人三百户，无眚。

六三 食旧德，贞厉，终吉。或从王事，无成。

九四 不克讼，复即命渝，安贞吉。

九五 讼，元吉。

上九 或锡鞶带，终朝三褫之。

## 师卦第七

师：贞，丈人吉，无咎。

初六 师出以律，否臧凶。

九二 在师，中吉，无咎；王三锡命。

六三 师或舆尸，凶。

六四 师左次，无咎。

六五 田有禽，利执言，无咎；长子帅师，弟子舆尸，贞凶。

上六 大君有命，开国承家，小人勿用。

## 比卦第八

比：吉，原筮，元永贞，无咎。不宁方来，后夫凶。

初六 有孚比之，无咎；有孚盈缶，终来有它吉。

六二 比之自内，贞吉。

六三 比之匪人。

六四 外比之，贞吉。

九五 显比；王用三驱，失前禽，邑人不诫，吉。

上六 比之无首，凶。

## 小畜卦第九

小畜：亨，密云不雨，自我西郊。

初九 复自道，何其咎？吉。

九二 牵复，吉。

九三 舆说辐，夫妻反目。  
六四 有孚；血去惕出，无咎。  
九五 有孚挛如，富以其邻。  
上九 既雨既处，尚德载；妇贞厉，月几望；君子征凶。

## 履卦第十

履虎尾，不咥人，亨。  
初九 素履往无，咎。  
九二 履道坦坦，幽人贞吉。  
六三 眇能视，跛能履，履虎尾，咥人，凶；武人为于大君。  
九四 履虎尾，愬愬，终吉。  
九五 夬履，贞厉。  
上九 视履考祥，其旋元吉。

## 泰卦第十一

泰：小往大来，吉，亨。  
初九 拔茅茹，以其汇；贞吉。  
九二 包荒，用冯河，不遐遗；朋亡，得尚于中行。  
九三 无平不陂，无往不复；艰贞无咎，勿恤其孚，于食有福。  
六四 翩翩，不富，以其邻不戒以孚。  
六五 帝乙归妹，以祉元吉。  
上六 城复于隍；勿用师。自邑告命，贞吝。

## 否卦第十二

否之匪人，不利君子贞，大往小来。  
初六 拔茅茹，以其汇；贞吉，亨。  
六二 包承，小人吉；大人否，亨。  
六三 包羞。  
九四 有命无咎，畴离祉。  
九五 休否，大人吉；其亡其亡，系于苞桑。  
上九 倾否，先否后喜。

## 同人卦第十三

同人于野，亨，利涉大川，利君子贞。  
初九 同人于门，无咎。  
六二 同人于宗，吝。  
九三 伏戎于莽，升其高陵，三岁不兴。  
九四 乘其墉，弗克攻，吉。  
九五 同人，先号咷而后笑，大师克相遇。  
上九 同人于郊，无悔。

## 大有卦第十四

大有：元亨。  
初九 无交害，匪咎；艰则无咎。  
九二 大车以载，有攸往，无咎。  
九三 公用亨于天子，小人弗克。  
九四 匪其彭，无咎。  
六五 厥孚交如，威如，吉。  
上九 自天祐之，吉，无不利。

## 谦卦第十五

谦：亨，君子有终。  
初六 谦谦君子，用涉大川，吉。  
六二 鸣谦，贞吉。  
九三 劳谦，君子有终，吉。  
六四 无不利，撝谦。  
六五 不富，以其邻，利用侵伐，无不利。  
上六 鸣谦，利用行师征邑国。

## 豫卦第十六

豫：利建侯行师。  
初六 鸣豫，凶。  
六二 介于石，不终日，贞吉。  
六三 盱豫悔；迟有悔。  
九四 由豫，大有得；勿疑，朋盍簪。  
六五 贞吉，恒不死。  
上六 冥豫成，有渝无咎。

## 随卦第十七

随：元亨，利贞，无咎。  
初九 官有渝，贞吉；出门交有功。  
六二 系小子，失丈夫。  
六三 系丈夫，失小子；随有求得，利居贞。九四 随有获，贞凶；有孚在道，以明，何咎？  
九五 孚于嘉，吉。  
上六 拘系之，乃从，维之；王用亨于西山。

## 蛊卦第十八

蛊：元亨，利涉大川；先甲三日，后甲三日。  
初六 干父之蛊，有子考，无咎。厉终吉。  
九二 干母之蛊，不可贞。  
九三 干父之蛊，小有悔，无大咎。  
六四 裕父之蛊，往见吝。  
六五 干父之蛊，用誉。

上九 不事王侯，高尚其事。

## 临卦第十九

临：元亨，利贞；至于八月有凶。

初九 咸临，贞吉。

九二 咸临，吉无不利。

六三 甘临，无攸利；既忧之，无咎。

六四 至临，无咎。

六五 知临，大君之宜，吉。

上六 敦临，吉，无咎。

## 观卦第二十

观：盥而不荐，有孚颙若。

初六 童观，小人无咎，君子吝。

六二 闚观，利女贞。

六三 观我生，进退。

六四 观国之光，利用宾于王。

九五 观我生，君子无咎。

上九 观其生，君子无咎。

## 噬嗑卦第二十一

噬：亨，利用狱。

初九 履校灭趾，无咎。

六二 噬肤，灭鼻，无咎。

六三 噬腊肉，遇毒；小吝，无咎。

九四 噬乾肺，得金矢；利艰贞，吉。

六五 噬乾肉，得黄金；贞厉，无咎。

上九 何校灭耳，凶。

## 贲卦第二十二

贲：亨，小利有攸往。

初九 贲其趾，舍车而徒。

六二 贲其须。

九三 贲如，濡如，永贞吉。

六四 贲如，皤如，白马翰如；匪寇，婚媾。

六五 贲于丘园，束帛戔戔；吝，终吉。

上九 白贲，无咎。

## 剥卦第二十三

剥：不利有攸往。

初六 剥床以足，蔑；贞凶。

六二 剥床以辨，蔑；贞凶。



六三 剥，无咎。  
六四 剥床以肤，凶。  
六五 贯鱼以宫人宠，无不利。  
上九 硕果不食，君子得舆，小人剥庐。

## 复卦第二十四

复：亨，出入无疾，朋来无咎；反复其道，七日来复。利有攸往。  
初九 不远复，无祇悔，元吉。  
六二 休复，吉。  
六三 频复，厉无咎。  
六四 中行独复。  
六五 敦复，无悔。  
上六 迷复，凶，有灾眚。用行师，终有大败；以其国，君凶；至于十年不克征。

## 无妄卦第二十五

无妄：元亨，利贞。其匪正有眚，不利有攸往。初九 无妄，往吉。  
六二 不耕获，不菑畲，则利有攸往。  
六三 无妄之灾，或系之牛，行人之得，邑人之灾。  
九四 可贞，无咎。  
九五 无妄之疾，勿药有喜。  
上九 无妄行有眚，无攸利。

## 大畜卦第二十六

大畜：利贞；不家食吉；利涉大川。  
初九 有厉，利已。  
九二 舆说辐。  
九三 良马逐，利艰贞；日闲舆卫，利有攸往。  
六四 童牛之牯，元吉。  
六五 豶豕之牙，吉。  
上九 何天之衢，亨。

## 颐卦第二十七

颐：贞吉；观颐，自求口实。  
初九 舍尔灵龟，观我朵颐，凶。  
六二 颠颐；拂经，于丘颐，征凶。  
六三 拂颐；贞凶，十年勿用，无攸利。  
六四 颠颐，吉；虎视眈眈，其欲逐逐，无咎。  
六五 拂经，居贞吉；不可涉大川。  
上九 由颐，厉，吉，利涉大川。

## 大过卦第二十八

大过：栋桡；利有攸往，亨。  
初六 藉用白茅，无咎。  
九二 枯杨生稊，老夫得其女妻；无不利。  
九三 栋桡，凶。  
九四 栋隆，吉；有它，吝。  
九五 枯杨生华，老妇得其士夫；无咎无誉。  
上六 过涉灭顶；凶，无咎。

## 坎卦第二十九

习坎：有孚，维心亨；行有尚。  
初六 习坎，入于坎窞，凶。  
九二 坎有险，求小得。  
六三 来之坎坎，险且枕，入于坎窞。勿用。  
六四 樽酒，簋贰，用缶，纳约自牖，终无咎。九五 坎不盈，祗既平，无咎。  
上六 系用徽纆，寘于丛棘，三岁不得，凶。

## 离卦第三十

离：利贞，亨。畜牝牛吉。  
初九 履错然，敬之，无咎。  
六二 黄离，元吉。  
九三 日昃之离，不鼓缶而歌，则大耋之嗟，凶。  
九四 突如其来如，焚如，死如，弃如。  
六五 出涕沱若，戚嗟若，吉。  
上九 王用出征，有嘉折首，获匪其丑，无咎。

## 下 经

## 咸卦第三十一

咸：亨，利贞；取女吉。  
初六 咸其拇。  
六二 咸其腓，凶，居吉。  
九三 咸其股，执其随，往吝。  
九四 贞吉，悔亡；憧憧往来，朋从尔思。  
九五 咸其脢，无悔。  
上六 咸其辅颊舌。

## 恒卦第三十二

恒：亨，无咎，利贞，利有攸往。  
初六 浚恒，贞凶，无攸利。  
九二 悔亡。  
九三 不恒其德，或承之羞；贞吝。  
九四 田无禽。

六五 恒其德，贞；妇人吉；夫子凶。  
上六 振恒，凶。

### 遯卦第三十三

遯：亨，小利贞。  
初六 遯尾，厉，勿用有攸往。  
六二 执之用黄牛之革，莫之胜说。  
九三 系遯，有疾厉；畜臣妾，吉。  
九四 好遯，君子吉，小人否。  
九五 嘉遯，贞吉。  
上九 肥遯，无不利。

### 大壮卦第三十四

大壮：利贞。  
初九 壮于趾，征凶；有孚。  
九二 贞吉。  
九三 小人用壮，君子用罔，贞厉。羝羊触藩，羸其角。  
九四 贞吉，悔亡；藩决不羸，壮于大舆之輹。六五 丧羊于易，无悔。  
上六 羝羊触藩，不能退，不能遂，无攸利；艰则吉。

### 晋卦第三十五

晋：康侯用锡马蕃庶，昼日三接。  
初六 晋如摧如，贞吉；罔孚，裕无咎。  
六二 晋如愁如，贞吉；受兹介福，于其王母。  
六三 众允，悔亡。  
九四 晋如鼫鼠，贞厉。  
六五 悔亡，失得，勿恤；往吉，无不利。  
上九 晋其角，维用伐邑，厉吉，无咎，贞吝。

### 明夷卦第三十六

明夷：利艰贞。  
初九 明夷于飞，垂其翼；君子于行，三日不食。有攸往，主人有言。  
六二 明夷，夷于左股，用拯马壮，吉。  
九三 明夷于南狩，得其大首；不可疾，贞。  
六四 入于左腹，获明夷之心，于出门庭。  
六五 箕子之明夷，利贞。  
上六 不明晦；初登于天，后入于地。

### 家人卦第三十七

家人：利女贞。  
初九 闲有家，悔亡。  
六二 无攸遂，在中馈，贞吉。



九三 家人嗃嗃，悔厉，吉；妇子嘻嘻，终吝。  
六四 富家，大吉。  
九五 王假有家，勿恤，吉。  
上九 有孚，威如，终吉。

## 睽卦第三十八

睽：小事吉。

初九 悔亡；丧马，勿逐自复；见恶人，无咎。

九二 遇主于巷，无咎。

六三 见舆曳，其牛掣；其人天且劓。无初有终。

九四 睽孤；遇元夫，交孚，厉无咎。

六五 悔亡；厥宗噬肤，往何咎？

上九 睽孤，见豕负涂，载鬼一车，先张之弧，后说之弧；匪寇，婚媾；往遇雨则吉。

## 蹇卦第三十九

蹇：利西南，不利东北；利见大人，贞吉。  
初六 往蹇，来誉。  
六二 王臣蹇蹇，匪躬之故。  
九三 往蹇，来反。  
六四 往蹇，来连。  
九五 大蹇，朋来。  
上六 往蹇，来硕；吉，利见大人。



## 解卦第四十

解：利西南；无所往，其来复吉；有攸往，夙吉。  
初六 无咎。  
九二 田获三狐，得黄矢；贞吉。  
六三 负且乘，致寇至；贞吝。  
九四 解而拇，朋至斯孚。  
六五 君子维有解，吉，有孚于小人。  
上六 公用射隼于高墉之上，获之，无不利。

## 损卦第四十一

损：有孚，元吉，无咎，可贞，利有攸往。曷之用？二簋可用享。

初九 已事遄往，无咎；酌损之。

九二 利贞，征凶；弗损益之。

六三 三人行，则损一人；一人行，则得其友。

六四 损其疾，使遄有喜，无咎。

六五 或益之十朋之龟，弗克违，元吉。

上九 弗损益之；无咎，贞吉，有攸往，得臣无家。

## 益卦第四十二

益：利有攸往，利涉大川。

初九 利用为大作，元吉，无咎。

六二 或益之十朋之龟，弗克违，永贞吉；王用享于帝，吉。

六三 益之用凶事，无咎；有孚中行，告公用圭。

六四 中行告公从，利用为依迁国。

九五 有孚惠心，勿问元吉，有孚惠我德。

上九 莫益之，或击之，立心勿恒，凶。

## 夬卦第四十三

夬：扬于王庭，孚号有厉；告自邑，不利即戒；利有攸往。

初九 壮于前趾，往不胜为咎。

九二 惕号，莫夜有戒，勿恤。

九三 壮于頄，有凶；君子夬夬。独行，遇雨若濡，有愠，无咎。

九四 臀无肤，其行次且；牵羊悔亡，闻言不信。

九五 苋陆夬夬，中行，无咎。

上六 无号，终有凶。

## 姤卦第四十四

姤：女壮，勿用取女。

初六 系于金柅，贞吉；有攸往，见凶，羸豕孚蹢躅。

九二 包有鱼，无咎。不利宾。

九三 臀无肤，其行次且；厉，无大咎。

九四 包无鱼，起凶。

九五 以杞包瓜，含章，有陨自天。

上九 姤其角；吝，无咎。

## 萃卦第四十五

萃：亨；王假有庙，利见大人，亨利贞；用大牲吉。利有攸往。

初六 有孚不终，乃乱乃萃；若号，一握为笑，勿恤，往无咎。

六二 引吉，无咎；孚乃利用禴。

六三 萃如嗟如，无攸利；往无咎，小吝。

九四 大吉，无咎。

九五 萃有位，无咎，匪孚；元永贞，悔亡。

上六 齎咨涕洟，无咎。

## 升卦第四十六

升：元亨。用见大人，勿恤，南征吉。

初六 允升，大吉。

九二 孚乃利用禴，无咎。

九三 升虚邑。

六四 王用亨于岐山，吉，无咎。  
六五 贞吉，升阶。  
上六 冥升，利于不息之贞。

### 困卦第四十七

困：亨；贞，大人吉，无咎；有言不信。  
初六 臀困于株木，入于幽谷，三岁不覿。  
九二 困于酒食，朱紱方来，利用享祀；征凶，无咎。  
六三 困于石，据于蒺藜；入于其宫，不见其妻，凶。  
九四 来徐徐，困于金车，吝，有终。  
九五 劓刖，困于赤紱；乃徐有说，利用祭祀。  
上六 困于葛藟，于臲臲；曰动悔有悔，征吉。

### 井卦第四十八

井：改邑不改井，无丧无得，往来井井，汔至亦未繙井，羸其瓶，凶。  
初六 井泥不食，旧井无禽。  
九二 井谷射鲋，瓮敝漏。  
九三 井渫不食，为我心恻；可用汲，王明并受其福。  
六四 井甃，无咎。  
九五 井冽，寒泉食。  
上六 井收，勿幕；有孚，元吉。

### 革卦第四十九

革：巳日乃孚，元亨，利贞，悔亡。  
初九 巩用黄牛之革。  
六二 巳日乃革之，征吉，无咎。  
九三 征凶，贞厉；革言三就，有孚。  
九四 悔亡，有孚改命，吉。  
九五 大人虎变，未占有孚。  
上六 君子豹变，小人革面；征凶，居贞吉。

### 鼎卦第五十

鼎：元吉，亨。  
初六 鼎颠趾，利出否；得妾以其子，无咎。  
九二 鼎有实，我仇有疾，不我能即，吉。  
九三 鼎耳革，其行塞，雉膏不食；方雨亏悔，终吉。  
九四 鼎折足，覆公餗，其形渥，凶。  
六五 鼎黄耳金铉，利贞。  
上九 鼎玉铉，大吉，无不利。

### 震卦第五十一

震：亨，震来虩虩，笑言哑哑；震惊百里，不丧匕鬯。

初九 震来虩虩，后笑言哑哑，吉。  
六二 震来，厉；亿丧贝，跻于九陵，勿逐，七日得。  
六三 震苏苏，震行无眚。  
九四 震遂泥。  
六五 震往来，厉；亿无丧，有事。  
上六 震索索，视矍矍，征凶；震不于其躬，于其邻，无咎；婚媾有言。

## 艮卦第五十二

艮：艮其背，不获其身；行其庭，不见其人。无咎。  
初六 艮其趾，无咎，利永贞。  
六二 艮其腓，不拯其随，其心不快。  
九三 艮其限，列其夤，厉薰心。  
六四 艮其身，无咎。  
六五 艮其辅，言有序，悔亡。  
上九 敦艮，吉。

## 渐卦第五十三

渐：女归吉，利贞。  
初六 鸿渐于干，小子厉，有言，无咎。  
六二 鸿渐于磐，饮食衎衎，吉。  
九三 鸿渐于陆，夫征不复，妇孕不育，凶；利御寇。  
六四 鸿渐于木，或得其桷，无咎。  
九五 鸿渐于陵，妇三岁不孕；终莫之胜，吉。上九 鸿渐于陆，其羽可用为仪，吉。

## 归妹卦第五十四

归妹：征凶，无攸利。  
初九 归妹以娣，跛能履，征吉。  
九二 眇能视，利幽人之贞。  
六三 归妹以须，反归以娣。  
九四 归妹愆期，迟归有时。  
六五 帝乙归妹，其君之袂，不如其娣之袂良；月几望，吉。  
上六 女承筐，无实；士刲羊，无血。无攸利。

## 丰卦第五十五

丰：亨，王假之；勿忧，宜日中。  
初九 遇其配主，虽旬无咎，往有尚。  
六二 丰其蔀，日中见斗，往得疑疾；有孚发若。吉。  
九三 丰其沛，日中见沫。折其右肱，无咎。  
九四 丰其蔀，日中见斗；遇其夷主，吉。  
六五 来章，有庆誉，吉。  
上六 丰其屋，蔀其家，闚其户，阒其无人，三岁不覿，凶。

## 旅卦第五十六

旅：小亨，旅，贞吉。

初六 旅琐琐，斯其所取灾。

六二 旅即次，怀其资，得童仆，贞。

九三 旅焚其次，丧其童仆，贞厉。

九四 旅于处，得其资斧，我心不快。

六五 射雉，一矢亡；终以誉命。

上九 鸟焚其巢，旅人先笑，后号咷；丧牛于易，凶。

## 巽卦第五十七

巽：小亨，利有攸往，利见大人。

初六 进退，利武人之贞。

九二 巽在床下，用史、巫纷若吉，无咎。

九三 频巽，吝。

六四 悔亡，田获三品。

九五 贞吉，悔亡，无不利；无初有终；先庚三日，后庚三日，吉。

上九 巽在床下，丧其资斧；贞凶。

## 兑卦第五十八

兑：亨，利贞。

初九 和兑，吉。

九二 孚兑，吉，悔亡。

六三 来兑，凶。

九四 商兑未宁，介疾有喜。

九五 孚于剥，有厉。

上六 引兑。

## 涣卦第五十九

涣：亨，王假有庙，利涉大川，利贞。

初六 用拯马壮吉。

九二 涣奔其机，悔亡。

六三 涣其躬，无悔。

六四 涣其群，元吉；涣有丘，匪夷所思。

九五 涣汗其大号，涣王居，无咎。

上九 涣其血去逖出，无咎。

## 节卦第六十

节：亨；苦节不可贞。

初九 不出户庭，无咎。

九二 不出门庭，凶。

六三 不节若，则嗟若，无咎。

六四 安节，亨。  
九五 甘节，吉，往有尚。  
上六 苦节；贞凶，悔亡。

### 中孚卦第六十一

中孚：豚鱼吉。利涉大川。利贞。  
初九 虞吉，有它不燕。  
九二 鸣鹤在阴，其子和之；我有好爵，吾与尔靡之。  
六三 得敌，或鼓或罢，或泣或歌。  
六四 月几望，马匹亡，无咎。  
九五 有孚挛如，无咎。  
上九 翰音登于天，贞凶。

### 小过卦第六十二

小过：亨，利贞；可小事，不可大事；飞鸟遗之音，不宜上，宜下，大吉。  
初六 飞鸟以凶。  
六二 过其祖，遇其妣；不及其君，遇其臣，无咎。  
九三 弗过防之，从或戕之，凶。  
九四 无咎，弗过遇之；往厉必戒，勿用，永贞。  
六五 密云不雨，自我西郊；公弋取彼在穴。  
上六 弗遇过之，飞鸟离之，凶，是谓灾眚。

### 既济卦第六十三

既济：亨，小利贞；初吉终乱。  
初九 曳其轮，濡其尾，无咎。  
六二 妇丧其茀，勿逐，七日得。  
九三 高宗伐鬼方，三年克之，小人勿用。  
六四 繻有衣袽，终日戒。  
九五 东邻杀牛，不如西邻之禴祭，实受其福。  
上六 濡其首，厉。

### 未济卦六十四

未济：亨；小狐汔济，濡其尾，无攸利。  
初六 濡其尾，吝。  
九二 曳其轮，贞吉。  
六三 未济，征凶；利涉大川。  
九四 贞吉，悔亡；震用伐鬼方，三年有赏于大国。  
六五 贞吉，无悔；君子之光。有孚吉。  
上九 有孚于饮酒，无咎；濡其首，有孚失是。